


武夷紀要

圖說



武夷山在崇安縣南三十里杜光庭洞天記稱為第  
 十六昇真元化洞天蕭子開建安記曰武夷山高五  
 百仞巖石紅紫二色望若朝霞有石壁峭拔數百仞  
 於煙嵐之中石間有木碓籩箕籬箸竹器等物顧野  
 王謂之地仙之宅半巖有縣棺數十魏王泰坤元錄  
 云建陽縣上百餘里有仙人葬山亦神仙所居之地  
 郡國志云漢武好祀天下岳瀆此山與祭故曰漢祀



陸鴻漸以爲昔有神人自稱武夷君來降此山因以爲名白玉蟾引奏列仙傳以爲錢鏗與二子曰武曰夷隱居斯山豈鴻漸所指神人者卽鏗之子而君長於斯者乎朱考亭謂皆詭妄不經不足考信然今仙船有七四在大王峰一在兜鑿峰二在小藏峰又有虹橋板散插諸峰皆懸崖峻壁之處無論人力不能致卽此脆薄之木千年之後不壞於風雨之飄零向非神仙靈蹟安得若是卽如考亭所擬以爲往古避

武夷紀要

圖說

三

世之士生爲衆所臣服沒而傳以爲仙故漢武帝祠以乾魚歷代帝王載於祀典亦云竒矣按名山志是山周一百二十里崇安一水從分水關來至九曲溪匯流處東爲裴村公館西則問津亭址在焉溯流而上卽萬年宮大王峰在宮右高數千仞其陽縱裂一罅長數百尺下有木槎立橫石上趨捷者從石上攀援至木末背靠足蹬可至絕頂頂夷曠有昇真觀址有禮斗臺天鑑池池右有投龍洞洞口直下垂縵千



尺始及泉宋嘗遣使投金龍玉簡於中近峯頂有磚  
卷城門魏王所築也峯之腰有昇真洞可坐十數人  
洞中藏仙蛻函十一空函九外插木板板閣小舟迺  
剗木所爲者又橫架獨木爲橋從木槎下出石罅轉  
左磴石罅數丈上有石室丈餘徐仙坐解遺蛻在焉  
轉右磴合壁上亦有石室丈餘張仙坐解遺蛻在焉  
峯之左爲幔亭峰魏王子騫與皇太姥武夷君架虹  
橋設幔宴曾孫之處漢孝武遣使禱祀于峯下其石

武夷紀要

圖說

四

盤陀方廣數十丈名漢祀臺旁爲雲龍道院址彭祖  
之居也大王峰之右壁厓裂紋如繪鶴曰仙鶴巖巖  
下爲禪巖巖前爲修真壇迺張湛等遇控鶴真人之  
所巖下爲止止菴十三仙修煉之所也瀑布流澆水  
光石入溪石上刻一曲字九曲溪萬丈丹青碧水丹  
山漸入佳景修身爲本智動仁靜諸字石門巖刻石  
門字刻靈源一派字溪之西有巖蹲踞昂首曰獅子  
峯左爲大小觀音峰此一曲之觀也觀音峯左兜鍪



峰下爲九峯書院路通一線天近鰲峰者粧鏡臺刻  
二曲字鏡臺二大字對鏡臺者玉女峰刻第一山字  
次爲勒馬峯凌霄巖赤壁峯遠望則三峰虎嘯巖也  
自赤壁進爲小藏峯峯中崖壁迴合爲石室几案布  
列謂之仙學堂水中浮印石檀音石儒冠石刻千崖  
萬壑字溪之東爲鐵板嶂嶂後仙猿巖嶂右翰墨巖  
崖石隱起狀若墨鋌下有二孔如人目俗呼回子獻  
墨巖此二曲之觀也之墨巖者會仙巖昇日峯也進

武夷紀要

圖說

五

而車錢巖廼聖姥鞭牛背錢之地上有白玉蟾丹竈  
在焉水中方石如砥曰三盃石可停棹坐飲溪流衝  
激作聲謂之水樂溪之西峭壁千仞謂之大藏峯崖  
端石室數穴亂插木板望之如棧一穴板上閣小舟  
謂之架壑船下刻三曲字飛仙臺字此三曲之觀也  
大藏而上爲雞窠巖中有洞穴外隘中宏藏仙蛻數  
函橫插木板草篠縱橫堆積如雞棲狀傳聞有僊雞  
鳴於內名金鷄洞旁有數穴嘉靖乙巳飛鐵香鑪大



如覓入洞中登岸可仰而見巖下臥龍潭旁刻四曲  
字上爲宴僊巖左爲李僊巖李蛻尚存石龕壁峭不  
可登下爲御茶園龍井龍亭在焉澗水從碧雲橋下  
出自此而上爲更衣臺天柱峯蓋魏王更衣登天柱  
也溪中巨石介水中數折號小九曲遊舟可穿入復  
有試劍石上水魚石溪之東爲釣魚臺其半銜開一  
穴名真武洞內藏仙蛻三函近溪爲希真巖題詩巖  
此四曲之觀也魚臺連大隱屏屏下文公書院屏後

武夷紀要

圖說

六

伏羲洞洞廣數丈有石堆列如畫卦又名先天洞左  
爲羅漢洞外有黑洞曰回回洞其上坦平鐵笛亭址  
也溪中石如竈曰茶竈石溪西爲晚對峰刻五曲字  
高山仰止字由書院右數折至雲窩過鐵象巖石門  
撞寇石從小徑而入半里許有境一匝四周穹崖壁  
立產茗名曰茶洞進數武卽接笋峯有一石附屏三  
接狀若立笋倚梯十丈梯盡右折鑿石爲徑僅容趾  
名曰雞胸穿崖環以鐵纜登者捫纜側行石徑斷處



復橫木爲棧至頂則兩壁洞裂一磴孤懸下俯百丈  
名曰龍脊上甚平坦有道院亭館泉池園圃恍疑在  
天上此五曲之觀也下接筍轉至僊掌巖壁崖紋類  
人指掌者十數痕長二丈餘從磴道登天遊觀一覽  
亭可窮三十六峯之勝過此則石門巖溪旁有燕石  
溪中有曹家石自溪而西爲響聲巖刻六曲字逝者  
如斯字又仙跡巖蒼屏峰壘疊而起此六曲之觀也  
蒼屏而上山形高峙長亘五百餘丈曰城高巖亦名

武夷紀要

圖說

七

神臯有上下二處其巖中嵌空刻空谷傳聲四字溪  
東三仰峯爲武夷最高處中有碧霄洞下爲陷石堂  
其地古爲禪寺宋天聖間忽一夜雷雨陷沒今石厓  
交橫外成石門僅容足進十餘步平曠又名小桃源  
堂門口盤旋聯屬狀若廊廡卽北廊巖刻七曲字巖  
頂天壺巖溪中上水龜石此七曲之觀也接天壺者  
爲鼓樓巖巖前一峯屹立如鼓狀曰鼓子峯下崖壁  
廣數百丈壁間裂開一穴可容四五十人吳公成道



於此曰吳公洞下爲鼓子菴左連鐘模巖獅子巖刻  
八曲字又有猴藏巖巖下爲百花庄三層峯三峯鱗  
疊水中禪笠石下水龜石海蚌石此八曲之觀也九  
曲溪頭爲靈峯白雲巖玄都觀在其下巖左爲毛竹  
洞次而三峯並峙曰三教峯下有香爐石方正如爐  
對峙丘公巖內有石室廣數丈丘公於此成道故以  
名焉近溪有大小廩石磨石溪盡處爲星渚渡文公  
所謂桑麻之墟者此九曲之觀也自一曲至九曲有

武夷紀要

圖說

八

十五里之遙一曲一灣一灘山周圍環溪有山  
南山北之分如盆中置石是也一石自爲一峯詭譎  
奇瑰互相參錯可名者三十六而不可名者尤多峯  
頭石而戴土與崖谷間皆產青松脩竹雜以嘉卉隙  
地爲茶園四時蒼翠如披雲錦清泉流洞壁間隨處  
皆有茲其所以爲名山之冠也與